



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

SSF Junior World Championships:
Sekhon-i Silver medal angu

Manny Pacquiao-i Philippines tir
atema nomination agütsüogo

VOL. XVIII NO. 350 (ADOK 350) DIMAPUR KÜPTOKNÜ (SATURDAY) MONGPUTENI (OCTOBER) 02, 2021 ₹ 5.00

Dimapur nung Covid tenokdangba magiener saka aika salatsür

Dimapur, October 1, 2021 (TYO): Dimapur District nung October 1 nungi 31, 2021 tashi Covid lockdown alitsü saka talenba talila salatsütsü ta Deputy Commissioner-i metetdaktüsügo.

Iba mapang dokan ajak anogoshia anepdang 6:00 ako nungi aonung 9:00 ako tashi lapoktsü melar, ta Dimapur Deputy Commissioner-i ashi.

Küle, Night Curfew ghonda ka ajema akümer aser ibaji aonung 10:00 ako nungi anepdang 4:00 ako tashi alitsü, ta paisa ashi.

Containment zones temalen

lokto sentongtem, kilung aser kima nung 100% tashi adenshitsu melar. Ajisüaka sentong nung adener ajak COVID-19 agirtem mesüra mezüing dose agir anogo 15 bo süir asütsüla. Sentong ajak nung COVID-19 inyakyim aser SOPs sülen anidaktüsüla, ta Dimapur DC-isa metetdaktüsü.

COVID-19 tensa tajungba kümra November 1, 2021 nungi school nung class ajak atema regular/ offline class tenzütsü melatsü. Iba ya Home Department-i latetba SOPs sülen anidaka lapoktsü, ta paisa ashi.

COVID-19 Nagaland: Puteter dang nungibo taneptsü angur teimba

Kohima, October 1, 2021 (TYO): Nagaland nung tanü agi anogo trokbuba COVID-19 puteter dang nungibo taneptsü angur teimba liasü. Tanü COVID-19 puteta alir nisung 27 taneptsü angu aser 21 dak putet.

"Tesüiba ghonda 24 tsüingda COVID-19 puteta alir nisung 27 taneptsü angu. Parnokji Dimapur nung 16, Mokochung nung 6 aser Kohima nung 5 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang nisung 21 dak COVID-19 putet. Parnokji Dimapur nung 9, Kohima nung 4, Mokochung nung 3, Phek o Wokha nung anana (2) aser Longleng nung 1 lir, ta paisa ashi.

Nisung 31,265 nungi 29,254 taneptsü nguogo aser ibaji 93.56% lir ta paisa shisem.

Tang Nagaland nung nisung 347 anepaludar saka parnok 263

dakbo shirangba yimya kecha mali, ta Dr Kikon-isa metetdaktüsü.

Hokolbarnü Mokochung nung COVID-19 puteta alir ka asüba züingsema tasür ajak agi 666 kümogo saka nisung 15 dakbo tanga tashidak liasü, ta paisa ashi.

"Brihostibar tashi nung nisung 688,639 nem COVID-19 vaccine indang dose 10,56,751 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,935, healthcare workers 15,996, arishi küm 45 ser tempur 198,282 aser arishi küm 18 nungi 44 tsüingda alir 413,426 lir" ta paisa shisem.

"Vaccine agirtem rongnung nisung 368,112-i dose anaprong agiogo. Parnokji frontline workers 47,294, healthcare workers 13,262, arishi küm 45 ser tempur 138,104 aser arishi küm 18 nungi 44 tsüingda alir 169,452 lir" ta Dr Thurr-isa metetdaktüsü.

Nagaland nung International Tourism Mart aser Hornbill Festival amongtsü 2019 HORNBILL FESTIVAL NUNG ENTREPRENEURS-i Rs 101 CRORE TASHI AJANGZÜK

Kohima, October 1, 2021 (TYO): Nagaland nung December 1 nungi Hornbill festival amongtsü aser ano November ita International Tourism Mart (ITM) amongtsü, ta Tourism and Art & Culture Advisor, Khehovi Yeputhomi-ia ashi.

Hokolbarnü Tourism department-i kon hohotem den senden ka amendang Yeputhomi-ia osang metetdaktüsü.

"2000 küm nungi Hornbill festival mongyonga arur yaküm COVID-19 wara ajanga memongtet saka Nagaland nung positivity rate ajema akümba ajanga takümba amongtsü" ta pai ashi.

"2019 küm Hornbill festival amongdang nisung lakh 3 arua shilem agi aser entrepreneurs nem Rs 75 crore shi tajangzük bentsür arua liasü. Ajisüaka, tanga district tem nung aser talisa Dimapur nung razüka oa amongba ajanga entrepreneurs-i Rs 101 crore tashi ajangzüka liasü" ta tanü Tourism Department joint director, Veyielo Doulo-ia ashi.

Iba benjung ya alimai meteta amonger aser tesem balala nungi tourists atsür arutsüsa sobaliba aliba ya Naga nung asoshi tia tajung lir, ta Yeputhomi-ia ashi.

Kisama nung Heritage village nung kin shia indang morung 17 lir saka COVID-19 wara ajanga item ya jungjunga anepalu mesütet. Anungji kin hohotemi küm piyong pei pei morung tem anepalutsü mepishir, ta paisa metetdaktüsü.

"Hornbill festival ya tourism aser art & culture ajungkettsü atema dang masü saka kintem tsüingda tesentaktep akangshitsu atema lir. Anungji kin balala tsüingda sobaliba sayutepba sentongtem agitsü ayongzük" ta Advisor Yeputhomi-isa ashi.

Hornbill festival mamongdang November 28 nungi 30 tashi International Tourism Mart (ITM) amongtsü, ta paisa ashi.

Iba sentong ya Ministry of Tourism ajanga ayongzük aser Nagaland nung tang mezüing atema amongtsü. North East nung tourism ajungkettsü atema iba sentong amonger, ta Yeputhomi-isa metetdaktüsü.

Iba jagi November 15 tashi nung kin hohotemi Kisama nung pei pei morung tem yanglutsü ayongzük, ta paisa ashi.

Hornbill Festival amongdang COVID-19 inyakyim aser Standard Operating Procedures akangkanga bentshitsu, ta paisa shisem.

"Vaccine agiba ya politics

mesüra tamangba yimsü den sendaktepa mali saka nisung taküm kümzüka ayutsü atema dang lir. Hornbill festival nung SOP timi latetsü atema Tourism Department-i medical department den senden ka amentsü" ta Advisor-isa metetdaktüsü.

"Nagaland nung tobur tajung tesemtem aliba ajanga tourism wadang inyaksü lenmang sadema lir" ta Tourism Joint Secretary, T Yanpvuthung Kikon-ia ashi.

"Alima nung tourism ya tajangzük anguba wadang ka lir saka Nagaland nungbo tourism sector jenjang mejungi lir" ta paisa ashi.

Sorkari tourism infrastructures aika yangluogo saka tesem aika nung ali kibur dak sendakba ken o tem adoka lir anungji village councils aser kin teloktemi yariteptsü ayongzük, ta Yanpvuthung Kikon-isa metetdaktüsü.

Paisa Kohima nung kin hohotem dang colony nung masü saka Kisama nung benjung amongtsü mepishi.

"Hornbill festival amongba sülen morung tem ya nijatem nem amshitsu agütsüra teti anepalutsü" ta Joint Director Tourism Veyielo Doulo-ia ashi.

Chuchuyimlang nung LTM Lokti Senden takok ngua agiogo

Mokokchung, October 1, 2021 (TYO): Langpangkong Tzükong Mungdang (LTM) 43-buba Lokti Senden sentong Chuchuyimlang yimtak Anu Mai Amphitheatre nung October 1, 2021 nü Chuchuyimlang Rionsanger Putu-i ayonga agiogo.

Senden nung PWD (Housing and Mechanical) Minister Tongpang Ozukum, Industries & Commerce, Labour & Employment aser Skill Development & Entrepreneurship Advisor Imnatiba, MLA Amenba Yaden aser Tzükong kübok aliba yimtsüing aser jila balala Loknutem nungi teshimtet tongti lennirtem aden.

Sentong nung CEC, Dimapur Director Supongnenba Longkumer-i "Yimkong Süpen mera ka" omen nung ajemdaker onük jembi.

"Alima nung arishi talangka lir kecha meinyaktet dang nungibo, alima nung tatsüka alidang mapa tajung jenti inyakteta yutsübaji tajungba" ta Supongnenba ashi.

"Asen taküm aser lokti asoshi asa-ashi mesüdaktüsü nükla



43 buba LTM Lokti senden sentong nung Onük jembi CEC, Dimapur Director Supongnenba Longkumer; PWD (H&M) Minister Tongpang Ozukum; Industries & Commerce, Labour & Employment aser Skill Development & Entrepreneurship Advisor Imnatiba aser MLA Amenba Yaden nungeri shilem agidang tangokba noksa angur.

tajungtem mapa küma inyaksü tangatetba yudi. Melenshiba putu nung memelenshiba taküm, lokti, aser yimten masütsüla" ta paisa ayongzük.

Sentong nung Minister Tongpang Ozukum-ia, "alima wara tesashi ajanga asenok dang pei sasa inyakba nung metaloka aser poksünga alitsü atema ali dangi tanaben meyipa aotsü tesayuba agütsüogo. Anungji asen tsüraburtemi meranga inyakba tsüingsü tajungtem tanaben asentenshia asen lima anguba lirem rongsentem amshia terenlok tsütsü tali temulung agütsüdi" ta ajungshi. Paisa Tzükong nungi parnok

NLA züingsem aseme tongpu apua Tzükongsanger aser nüburtem ajak arok külemsür State sorkar nem tanungba agüja Chuchu Town, Tzüdikong aser Changtongya Town asemprongla ya full-fledged Town Committee Council agüjang ta khangti ta ayongzük.

"Tzükong nung alima yimtsüingtem shirkok COVID vaccination noklang nung noklang temrema agiogo ajak dang pelaba metetdaktüsü aser tanungba yimtsüingtem danga nübur inti kümzüka alitsü mechi yaktasa vaccine agiadoktsüla, ta Tongpang-isa ayongzük.

Paisa, "Social media olulu

balala nem mepuadaktüsü scientific aser mongintem tetuyuba sülen anidakang," ta shia liasü.

Sentong nung Advisor Imnatiba-ia tajungshi O tatsüka jembidang, asen sasa asen dak tenüksünga bilemba ama tangari inyaktetba mapa nunga tenüngsang agütsüba putu tasen ka tenzükti ta ajungshia liasü. Rangben liro medem ka nung longjemer aoba ajanga terenlok aser temelenshiji arulanglang ta paisa rajemtsü.

MLA Amenba Yaden-ia tajungshi O tatsüka jembidang, asen tetsü-tebou mapang mapa tajung balala jenjangdong

alangteta toktsübatem tanaben asentenshidakja parnoki majang yangteta toktsüba nungi süngsem tasen ka adokdaktüsü nükjidong yur inyakti ta mungdangsangertem dang ajungshia liasü.

LTM Tzükong Mungdang ketdangpurtemi ketdangsüa aniba sentong nungsa M. Zülü Ozükum-i Tir O jembi; Tsükjemtangit, Secretary, Chuchuyimlang Village Council-i mungdangsanger pelaa agizük; A. Pangjung Jamir, Tir, Kohima Langpangkong Senso Telongjem (KLST) aser SN Meren, Tir Dimapur Langpangkong Senso Telongjem (DLST) nati sümedem O jembi aser Rionsanger Putu Tatar, Chuchuyimlang ajanga Sobaliba ken ka tena liasü.

2021-2024 kümsük atema LTM ketdangpurtem item ya shimtet

- * Tir-Marsanen (Merangkong)
- * Tatong Tir - Watitoshi (Wamaken)
- * Tongti Zülur - R. Nukshi (Yaongyimsen)
- * Repsem Zülur - Limasangwa (Unger)
- * Senyur - S. Temsü Pongen (Chuchuyimlang)
- * Sen Zülur - Imtisunep (Salulamang)

Nagaland nung Film policy yangluba mapang lir: IPR Director



Dimapur nung ananü Film Acting Workshop agiba anogo tatebangba (October 1, 2021) nung Director, IPR, Tokishe Sema-i jembidang tangokba noksa ka yangi angur.

Dimapur, Mongputeni/October 01 (TYO): Nagaland nung Film policy yangluba mapang lir aser Nagaland State Film Development Society/Board tenteta Film sabur, yanglur, director, production house nungi züngsemtem shimoktsü, ta Director, Information & Public Relations, Tokishe Sema-i metetdaksü.

DIPR, Government of Nagaland ajanga sponsor süa Find Studio ajanga Niathu Resort den lungjemer ananü ayongzükba Film Acting Workshop tatebangba anogo, October 1, 2021 nü pai iba osang ya metetdakja liasü.

Nagaland ya tebour tajung lima ka lir aser yangi ano kin 16 nungi sobaliba aser yimsü tsütsü takar lir, anungji Nagaland indang sentsü ya

bendena Cinema balala nung amshitettsü, ta pai ashi.

Nagaland nung Films jenjang tajungbai ajungkettsü atema state sorkari nungi senotsü tsütsü teyari tajungba agütsütsü imlar, ta Tokishe-i ashi.

Ministry of Information and Broadcasting, Government of India kübok National Film Development Corporations den lungjemer Department of IPR ajanga North East Hornbill Festival 2021 ayongzüktsü, ta Director Tokishe Sema-isa metetdaksü.

Find Studio Production kibur, Rebecca Changkija-i Naga nung lanurtem Film yangluba nung tanen makai training agüja ajungshiba aser Nagaland nung Films ajungketba atema Tokishe-i tenüngsang agüja liasü.

Iba workshop nung shilem agir aika ngua pai pelaba lemsatop aser Naga nung lanurtem film yangluba wadang nung sempet ya lenmang shidak nung amshitsü imlar, ta ashi.

Maneni Cinema tsütsü Naga nung lanurtem dang lenmang sayutsü tejangraba nung Mumbai nungi takotet nübutem aruba atema pai pelaba lemsatopa liasü.

Musik A (Alobo Naga School of Music, Near Airport Gate Diphupar, Dimapur) nung ananü workshop agiba sentong nung Bollywood nungi Jaswinder Gardner, Media aser PR wadang nung takok jenti angur Jutikaa Mahannta aser Writer aser Director Shiraz Henry nungertem shisalen sayur liasü.

Security Forces temi Dimapur nung NSCN (Khango) züngsem ka apu

Dimapur, Mongputeni/October 01 (TYO): Security Forces temi Police den lungjemer September 29, 2021 nü operation ka agiba mapang general area Mishikito, Dimapur District, Nagaland nung NSCN (Khango) züngsem ka pua liasü, ta sangdong ka

ajanga ashi. Osang tejangja ka angazükba nung ajemdaker Security Forces temi State Police den lungjemer Dimapur district kübok general area Mishikito nung operation ka agiba mapang NSCN (Khango) züngsem ka apu. Iba mapang pa

ket nungi AK-56 Rifle loksar aliba den 7.62mm injang 13 nguteta liasü.

Iba dak sendakba nung ken o maneni bushisüngdangtsü mechi pua alisang den pa ket nungi ngutetba osettem ya East Police Station, Dimapur nem agütsüügo, ta sandong ajanga ashi.

Mon nung International Older Person's Day mungogo



October 1, 2021 nü Social Welfare Department, Mon ajanga International Older Person's Day DRDA Hall, Mon nung amungdang tangokba noksa nung angur.

Dimapur, Mongputeni/October 01 (TYO): Social Welfare Department, Mon ajanga "Digital Equity for all Ages" omen nung ajemdaker October 1, 2021 nü International Older Person's Day anogomung DRDA Hall, Mon nung munga liasü. Iba sentong nung SDO(C) Mon Hq, Illika Zhimomi, NCS ya tesemdanger tongti ka ama dena liasü.

Illika-i sentong nung jembiba mapang, loktiliba nung teintet rogotem kanga tongtipang lir, ta ashi aser parnok dang tajung bilema temang anema alitsü ayongzükba liasü.

Teintet rogotemi puti otsü angazükba aser meteta aliba ya tarutsü putu dang sayutsüla.

Parnoki aisü nung tajangshiba aser shisatsü agi lanurtem len anitsüla aser ajungshitsüla, ta lai ayongzükba liasü.

Sentong nung DWO, Mon, Y. Tauhong Ngonyen-i jembiba mapang, iba anogo ya alima tesem ajungalen amunger, ta ashi. Pai iba sentong nung teintet rogo nungi nisung ana, Lyu-Ao Konyak aser T. Phamtong Konyak nem konang tetushi agüja liasü.

CDPO Mon, Renchano Odyuo-ia iba sentong nung Department nungi Chowkidar mapa nungi anisüngzükba alir teintet rogo ana, Thongwang aser Hongpheang nem tetushi agüja liasü.

CDPO, Phomching, Laitak ajanga sentong nung jembiba

mapang, teintet rogotem dak kongshiba tebilemtsü indang awareness agütsütsü nükjidong nung iba anogomung ya amunger, ta ashi.

Digital lima nung teintet rogotemi tajungtiba nung shilem agitsü nüngdak ta ajitetba omen ajanga ashir, ta pai ashi.

Teintet rogotem temaba jenjangi ajungketba ajanga parnok shinga daka memetaloki liteter aser kasa mapang technology ajanga parnok nem jenjang tajemba nung health care agütsü, ta Laitak-isa ashi.

Iba sentong nung LDA, DWO Office Mon, Yumah menden liasü aser Welfare Inspector, DWO Mon, Golang Kheman ajanga melepzüng o jembia liasü.

Tanü Kohima nung lokti nübudok alitsü

Dimapur, Mongputeni/October 01 (TYO): India linük tebu, Mahatma Gandhi asoba anogomung bilemteta aser Nehru Yuva Kendra Kohima Action Plan of Clean India Programme nung aliba ama October 2, 2021 anepdang 6:00 ako nungi tenzükba Kohima District kübok Government Institutions/Offices/Colonies/Wards/Villages ajak nung lokti nübudoka mapa inyaksü, ta Deputy Commissioner Kohima, Gregory Thejawelie, NCS ajanga sangdong ka nung metetdaksü.

Iba mapa Administrator,

Kohima Municipal Council; Administrators, Chiephobozou/Tseminyü Town Councils aser Hq/Area Administrative Offices temi anir inyaksü aser jana bendena indokba anepalutsü.

Ketdangsurtemi mapa inyakba indang noksa aser video tangoka phone number 7005175097 dangi WhatsApp asütsüla.

Iba mapa inyakba mapang ajaki COVID-19 tashidak nungi jenbua alitsü meratem agitsüla aser talisa mask agitsüla aser social distancing yimyatem amshitsüla, ta sangdong ajanga ashi.

Tanü Dimapur nung Molungyimsentsür shisatokten alitsü

DIMAPUR MOLUNGYIMSENTSÜR TELONGJEM

SEMINAR

OMEN

"Putu Den Apet Tetsür Ka"

DATE 2 ND OCT. 2021	TIME 9:00 AM	VENUE HOTEL SARAMATI, SUPER MARKET
-----------------------------------	-----------------	---------------------------------------

Dimapur, October 2, 2021 (TYO): Dimapur Molungyimsentsür Telongjem (DMT)-i "Putu Den Apet Tetsür Ka" omen nung ajemdaker shisatokten ka ayonga agitsü renema lir.

"Iba sentong ya October 2, 2021 anepdang 9:00 ako nungi Hotel Saramati, Supermarket Dimapur nung agitsü anungji Molungyimsentsür ajak arua adentsu mepishia sangdonger" ta DMT Tir Lanuienla Aier aser Tezüür Apokla Jamir nati

metetdaksüügo. Iba sentong nung taoba ABAM Women Ministry Secretary aser Mezüng Nagatsür Ola Mission, Molungyimsen Missionary, Mrs Temsula Lemtur-i Tsüngrem o jembitsü.

Maneni, Pro Vice Chancellor, Nagaland University-i Prof. Alemienla-i "Putu den apet tetsür ka" onük jembitsü aser Dimapur Government College Assistant Professor, Amongla Aier-i melepzüng o jembitsü, ta DMT mendenpurtemisa ashi.

Peren nung International Older Person's Day munga liasü

Dimapur, Mongputeni/October 01 (TYO): Deputy Commissioner, Peren indang Conference Hall nung October 1, 2021 nü International Day for Older persons, 2021 anogomung nüngtem nung sentong ka agiba mapang loktiliba nung shilem

tulu agiba tepela temaitsü Ahthibung jila nungi teintet rogo Hellam Kuki aser Songlüh yimtsüng nung Lhingjahat Mangjel nem akum agüja tenüngsang agütsü aser kulikaket den senpet agüja liasü.

Iba sentong ya Department of Social Welfare, Peren ajanga "Digital Equity for All Ages" omen nung ajemdaker ayongzükba liasü.

Deputy Commissioner, Peren, Sentiwapang Aier, NCS ajanga iba sentong nung jembiba mapang "Digital Equity for All Ages" omen nung ajemdaker teintet rogo ana ya ajungshia liasü.

Paisa sentong nung adenertem dang dangar dang tatishitsü tajung sayutsüsa temang anema alitsü yimyatem amshitsü ajungshia liasü.

Teintet rogo anati lokti nung shilem tajung agiba atema Deputy Commissioner-i pelaba lemsatop aser maneni kasa yimya amshitsü ayongzükba liasü.

District Welfare Officer Peren, Asangla Jamir ajanga teintet rogo ana indang takum otsü tongmelang agi ashiba mapang, Hellam Kuki ya July

1, 1947 nü Sailhem Village, Peren nung aso aser pa ya Retired Government Teacher aser Ahthibung Town indang Ex-GB ka lir, ta ashi.

Pa tesayur ka ama inyakba mapang Hellam Kuki yagi Sub-Division level (Peren) kübok Best Teacher Award ngua liasü aser pa ochishiba, dangar dak aria bilemba aser mapa ajak nung nendaka agüja inyakba nüburtemi meteta lir, ta Asangla Jamir-i ashi.

Lhingjahat Mangjel ya Old Jampi Village, Nagaland nung 1936 kum aso aser tang arishi kum 85 tain ya lar jabaso tambusang aser semchirtem den Songlüh yimdak alir, ta Asangla Jamir-i ashi.

Lhingjahat Mangjel-i arogo aser yimtsüng atema mapa tajung inyaksübatem aser lai wadang kar nung takok anguba indang Asanglai lemsatop aser lar mapang yimtsüng nung azüngtsü aser zülutsü meteter kanga anünga liasü, anungji Lhingjahat Mangjel-i Night School nung dena loktiliba nung tetsürtem jenjang tajungba kumdaksütsü atema inyaka liasü, ta ashi.

Lhingjahat Mangjel tazünga meliaka la dak tenük aneptsüba sempet ka lir aser yimtsüng nung alirtemi la dang temeim agi "Eye Doctor" ta ajar, ta Asangla-isa ashi.

Iba sentong nung District Welfare Officer Peren, Asangla Jamir menden liasü

Meghalaya chief secretary inyaktsü atema Rebecca Vanessa Suchiang shim

Guwahati, October 1, 2021

(Agencies): Meghalaya nung chief secretary inyaktsü atema Assam-Meghalaya cadre nungi 1989 batch IAS ketdangsür Rebecca Vanessa Suchiang shimogo.

La ya Meghalaya nung IAS ketdangsür tejentiba lir aser Khasi tsürtem rongnungi mezüingbuba chief secretary lir.

Suchiang ya Union Finance Ministry nung Additional Secretary inyaka liasü aser lai chief secretary mapa agizükogo.

Suchiang-i Chief Secretary MS Rao indang mapa

Kaziranga National Park lapokshir

Bokhakat, October 1, 2021

(Agencies): Hokolbar nungi Assam nung Kaziranga National Park lapokogo.

Assam forest minister Parimal Suklabaidya-i season 2021-22 atema national park lapoktsür ta tanü sangoktsü.

Assam nung Golaghat district kübok Kohora nung sentong ka agidang Suklabaidya-i iba osang metetdaksü.

Forest minister Suklabaidya-i Mihimukh tonga aodang gayan-bayan ajanga tetushi agüja liasü.

Iba sentong nung Agriculture minister Atul Bora, Principal Chief Conservator of Forests (WL) Dr. Amit Sahai, Chief Conservator of Forests Hirdesh Mishra aser Golaghat deputy commissioner Mrigesh Narayan nungertem aden.

Iba sülen minister Suklabaidya den agriculture minister Bora aser tourist temi jeep ka nung Kaziranga National Park semdanga liasü.

Kaziranga National Park semdanga sülen forest minister aser tangartemi shiditem nem chiyungtsü agütsü.

Kaziranga National Park lapokba sentong nung Assam forest minister-i tourist pungu pelashishia agizük.

Hokolbarnü Kaziranga National Park nung Kohora aser Bagori forests dang lapoktsüogo.

Tarutsü anogotem national park kübok tanga tesemtem lapoka aotsü. Kaziranga National Park ketdangsürtemi shiba agi tourist tem atema jeep safari lapoktsür.

Iba sentong nungsa Forest minister Suklabaidya-i Kaziranga National Park indang documentary ka sayatsü.

melenzük.

September 30 nü Rao mapa nungi sodi angu aser iba sülen pa State Public Service Delivery Commission nung Chief Commissioner inyaktsü shimogo. Iba ya Meghalaya Right to Public Service Act, 2020 nung ajemdaker shimba lir.

Assam-Meghalaya cadre nungi 1987 batch ketdangsür Rao-i December 2019 nungi Meghalaya Chief Secretary inyaktsü tenzuka liasü.

COVID-19 tensa atema mongin telok ka yoktsü

Aizawl, October 1, 2021 (Agencies): Centre-i Mizoram nung Covid-19 tensa asadangsü atema mongin telok ka yoktsü.

Yashi Lok Sabha MP C. Lalrosanga-i anir Mizoram nungi teshimtet telok ka den ajurutepa jembidang Union Health Secretary Rajesh Bhushan-i Centre nungi mongin telok ka yoktsü nangzük.

Iba dakji alia Centre-isa senotsü aser mozütem agütsütsü, ta Rajesh Bhushan-i metetdaksü.

Taoba ita Ministry of Health

and Family Welfare, Regional Office, Manipur aser National Centre for Disease Control (NCDC), Delhi nungi mongin nisungtemia Mizoram semdanga Covid-19 tensa asadanga liasü.

Centre-i Emergency Covid Response Package (ECRP) kübok Rs 44.38 crore lemzüktsüogo aser iba nungi mezüing instalment atema Rs.19.94 crore agütsüogo aser mezüing instalment amshiba odang tejangja agütsüba sülen tanünga sen agütsütsü, ta Union Health Secretary-isa ashi.

Centre-i Mizoram nem Covid-19 medicine Monoclonal Antibodies Cocktail (MAC) angati agütsütsü akok, ta paisa ashi.

Hokolbarnü Mizoram nung nisung 1,170 dak COVID-19 aliba puteta liasü. Parnok züingsema nisung ajak agi 94,830 kümogo.

Testüiba ghonda 24 tsüingda COVID-19 puteta alir nisung 3 asüba züingsema tasür ajak agi 310 kümogo.

Tang nisung 16,416 anepaludar aser 78,104 taneptsü nguogo.



Ministry of Information
and Broadcasting
Government of India

75
Azadi Ka
Amrit Mahotsav




2 October

parnok tasoba anogo nung
Gandhiji aser Shastriji
nem linüki akhüm agütsür

“Babu taküm aser tamaren shisatsü nungi tangazüktsü aika lir. Yimchiyimjung aser temeim aketba India yanglubaren nung pa taküm yimyatem agi asenok maneni anir. Iba kasaji, Shastri tongmelang taküm aser kin meimba mapatemji asenok atema tatishitsü tajung asütsü.”

- Narendra Modi



davp 22201/13/0035/2122



TIR YIMYIM YIMOBILEM (EDITORIAL)

DIMAPUR KÜPTOKNÜ, MONGPUTENI (OCTOBER) 02, 2021

District atemara!

Nagaland nung alirtem rongnung district tasen pungo trok ka akümtsü atema tesem balala nungi takangba tagütsüdak nung, ano Dimapur district headquarters ya tang Dimapur nungi Chumukedima-i belentsüba onük nung, Dimapur yimti nung alirtem o Chumukedima nung alirtem na tsungda rakteper amai atalokba ya ajak atema tensa tia tamajung ka tenjiogo ta bilemer. Atangji, Nagaland nung Dimapur district ya district tibuba asütsüsa 1997 küm Kohima district kübok liasüba nungi razüka ao. Dimapur ya district makümdangbo Additional Deputy Commissioner kati dang repranga liasü aser kodang district aküm la kübok Niuland aser Medziphema nungang ADC ayu aser Kuhuboto aser Dhansariphar na nung SDO ayu aser Chumukedima, Nihokhu aser Aqhunaga nungang Extra Assistant Commissioner kaka nem reprangdaksür. Ajisüaka, kodakirnaker Dimapur district atema headquarters asütsü asoshi Chumukedima shimtet aser Deputy Commissioner office tang aliba Dimapur yimti nungi Chumukedima-i belentsü asoshi office asütsü mapa tenzük. Iba office-ji tangbo renemogo aser government inyakyim nunga Dimapur district headquarters-ji Chumukedima ta amshir. Ajisüaka, tang timtem ka ajurubaji Dimapur yimti nung alirtemi Dimapur headquarters-ji Chumukedima leni bener meyokner, kechiyong ibaji Dimapur yimti nung government office tulutiba ka tangaleni belena bener aoer asütsü. Ano, külen Chumukedima nung alirtemi Dimapur DC office-bo yaktayongi Chumukedima nung renema ayu saka ki tejen küma DC office metenzüktebaji aitsür aser yaktasa Dimapur nungi Chumukedima-i District headquarters ya belendaksüner. Tanü ama Dimapur district indang ken o süoka jembidang, Dimapur district akümba yimya yabo tera balaka liasü, kechiyong tangarbo district tasen meshir saka küm 40 shi jakdangbo state government-i Dimapur ya district tasen ka kümnüaka, talisa Kohima nung alirtemi memulungi liasü. Iba kuliji parnokiang tajungba metettsü. Ajisüaka, küm 24 shi jakdang Dimapur district akümtsü jembidang Chumukedima ya Dimapur district headquarters asütsü ta tangatetba nung kümdaksü ta angazük. Ibaji shitak asütsü akok ta asüba kuliji, Dimapur district küm mekümka Nagaland nung lenirtem aikati, tarutsü mapang, memenui, Chumukedima ya Dimapur district headquarters akümtsü teimla nung ali kimong mekaa ayuba asenoki tangang tejangjaba angur. Atangji, Dimapur district asütsü asoshi Chumukedima-jia tetemsü, iba jagiang tamalen yimsüsürtemi mangdang tajungba ka yur shimtet alitsü. Ajisüaka, Dimapur nung dang masü saka koba tesem aser yimti nung südirsäka nübertem asoshi nungdak inyaksütsü atema amenoka akaba office ka tangaleni belena bener aotsübo memulungtsü. Aji nisunger yimya, anungji government-ia teka nung aliba kasaji dang melentepa agütsütsü meblem, alima aienba aser nütsüng renlokba yari talila apiteta aser yangluteta bener aruagi nübertem nem agütsütsü merangtsüla. Aiben Dimapur nung dang masü saka tesem ajaklen asenoki nübertem asoshi terenlok bener arutsübaji tang tesem ka nung amenoka aliba office ka, asenok dak yimten tashi ali dang, asen alidaki belena bener arubajiang amai bilemer. Ajisüaka, ibajibo terenlok masü saka yimten rongsen aser nübo endoka mapa bolur dang asütsü. Aji oda, tesem ka azüng-azünga kümdaksütsü aser iba jagi tesem ka longsütsütsü, nisung ka jashiseta yutsür nisung ka peladaksütsü, nisung kar sensaker kümdaksüba agi nisung kar takar kümdaksütsü ta asüba mapatemji terenlok mapa inyaksür masü saka nübertem tsungda rara adokdaksütsüba sentongang ka akümtsü. Dimapur yimti nung amenoka akabajisa bener oagi Chumukedima nung mamenokyonga, Dimapur nung akaba den kasa mesüra tuluba-ang ka amenoktsü bilemra, ibajiang shitakba terenlok asütsü. Asenoki asen kidanger kidang alibasa nükshi tashibo asenok putepa melitetsü aser asenok shisatsü aser rongsen nunga maintsü, saka kodang asenoki kidanger ki alema oagi bilemdangtsü aser inyakteta bener arutsü merangdir, idangjibo asen dang masü saka asen kidanger aser kiyongertema ajangzüksüsa asenok shisa tasen nguteta inyaktettsü. DC office ka atema Dimapur nung nübertem rongnung rongrongshishi pateka ya adokdaksü malang aser ano junga meblem dangi tashiyim agi inyaksü merangra, ashiko, lendongang tuluba adoktsüa akok. Iba tensa taji angateta, Dimapur aser Chumukedima nung alirtem ajak ya nisungchi, parnok bilemba aser aginüba shiitak dang, anungji Chumukedima aiendang Dimapur mezüngmeshi masütsüsa aser Dimapur aiendang Chumukedima meyirutsütsüsa, yimten yimsüsürtemi tanü putu dak apet shinga mokoksatsüsa telemtetba agitettsü imlar.

OLEMSABANG

Clean Election dak sendakba nung ajemtaker nia kü tangatetba ka lemsatepnür

- N. Saku Imsong, 4th Mile, Diphupar.

Tamalen paper osang aika nung clean election atema asen liner aikati oset tajung aika zülua aruba ngua kanga dang tzuratema züngogo. Iba ama o tajungtemji pa mesüra la tajangzük kar angutsü bilemba nung zuluba masü, saka asen lima teraksa tia ngua nüksü yima zuluba osangtem ta kagna shishia agizüker.

Iba den küleme YSS sapang ajanga liner tajung aikati molong shirang o aika jembibatem asenoki paper ajanga ngua arudagi. Tongtipangsa YIMOBILEM nung par shisa ajak azüngteta asenok den lemsatepbatem azüngdang aya Tsüngrem-ea yamai terajem shisatsü agi nubur dang ayimoktsüba ya koda jangratemtsü ta kangasa pelar.k

Anungji nia parnok den metenloksema kü shisa yari kar lemsatepnür. Asen limai election arur dang tashi nung ni kü vote kodanga dangar nem magütsüdaktsü, or shingaia kü vote alitsü marutet. Kechiaser kü voteji ni shingadanga mayuker ta partytur ajaki meteter süti.

Ni shinüba kechiba asenoki asen right vote dangari sen agi alitsü asüngdangtsüsa alir? shisadangang Au tangateter aser temeteter aikati alima otsü den lia nungi metemdanga tangatettsü teratet aika bener arua paper ajanga asenok den shisa lemsateper junger pelar.

Saka ajak liaka nai, pai, aser ni asenoki na aser niji shiba aji metetba jagi kodanga takok mangutsü. Nai na metetba tashi nungjibo dangari na mesüzükteptsü. (thats sure) saka nai aser ni kodang asenji angatettir, shingaia na amanglemtsü makoktsü. Aseni asen metetba kiji jagi asen tashi sayutsü tamakoktsü saka kodang aseni arenji angatettir aji teperi. Ni züngpong shinüba ni meteter metemer aika lir, aser panroki ni kodanga temesüzükba mangar ta niji angateta lir, ta shinür.

Anungji asenoki küleme shisadanga clean election atema ya tashiyim amshia masü senso lemtet masü, saka nübur atema shiba tetemsü ta shibai atangji nung alima aser nübur meimer ta asadanga onok ajangzükndang nübur mashioktsüli ta tangatetba teindang kati arur inyak nung koda ta bilemer.

Süra iba jenjangji atongtsü atema ternemba arok pangzüng kar yanglua ayu nung koda?

YAMAI :

- | | | |
|-------------------------------|---------------|---------------------|
| 1. Temeim nung ka | (aji mesüra), | sempateptsü |
| 2. Temolong ka | " | shisa majemtsü. |
| 3. Tepela nung ka | " | saka tema agi masü. |
| 4. Libaliro yima nung ka | " | majinütsü. |
| 5. Aküm tsübutep nugn ka | " | atalatsü. |
| 6. Ochishiba nung ka | " | teyazü jembitsü. |
| 7. Toshitepba nung ka | " | mezüngmeshitsü. |
| 8. Inyakba nung ka | " | majurunütsü. |
| 9. Yaritepba nung ka | " | mereprangnütsü. |
| 10. Ajungshitepba nung ka | " | süoki maitsü. |
| 11. Molongsentsü nung ka | " | sensatsütsü. |
| 12. Lemsatepba nung ka | " | mezüngoktsü. |
| 13. Azüokba nung ka | " | pei sünütsü asütsü. |
| 14. Bendanga agütsüba nung ka | " | paidoktsü. |
| 15. Aremzükba nung ka | " | anema aposotsü. |
| 16. Züngshiba nung ka | " | manidaksü. |

Anungji tatem nung itüm pangzüng 16 (sixteen) ya amshia, asen Tsüngrem dang asene nangzükba amato Naga lima khrista asoshi ta ayimtenbaji atalokdakja Tsüngrem peladakja tangatetba tajungba dangi arua sen masü alima yangluti jangyu metemangnee ta tambur molong shirang o lemsateper.

"Tsüngrem Lar Indang Shri. T. Meren Pauli Tir Yimyim nung Adoktsüba (Sept.4, 5) Iba Tsütsü O Semlok (rejoinder) kar Agütsür.

-Rev. S. Temjen Lungkumer, Chumukedima

Shri. T. Meren Pauli tongtibang onük ka bener aurogo ta bilemer. Mapang jenti endoka aser tani tebelem tulu agia, "Tsüngrem Lar" indang Lai tekong jenti bushia asenok dangi iba tebilemdangtsü onük tongtibang ka bener aruba atema pa dang kanga pelar. Aser pa o denji semloka nia tongtibang kar tatsü agi shiner.

Tasen Lai ya alar aika aliba putu nung zülü, anungji alar indang aiben shisema lir. Ken mapang nunbo Rom yimti nung alar nütsünyongsük timba liasü ta ashir. Nütsüng yongsük shilem asem nung shilem anabo alar liasü. Alartemji amang-sangwa metetemi mapa inyaka taa mangu aser temetena maka ta liasü.

Tasen lai tongtibangsa Tenyar Pauli shititem nung alar indang aiben shisema lir. Adianu T. Mereni Lai tekong aika sayuogo anungji ni idaki mesayur. Tenyar Paul-i "alar" "alar" ta aiben jembibaji pa aliba putu tensa tia (context) angatetdaksütsü asoshi jemi ta angateter. Tatishtisü ka: 1 Kor. 9:19 "Kechiyong ni nisung ajak nungi nüchi liaka, ni nisung tali ajangzüksü ni ajak lar aküm". Iba tetezü Paulji alar masü saka tangar aika khrista dangi anir arutsü atema pai pasasa teküboktiba jenjangi alu. Iba amaji shinübang pai alar tatishtisü aiben amshiba angur.

Tanü asenok rongnung "Tsüngrem Lar" ta jembiba O ya sayutsüngir aser Pastor temi tenla ki temeshi sabang (Pulpit) nungi Tsüngrem O jembidang parnok ajanga adokba südi ta angateter. Saka parnok shinüba timtem, shisabulu, maka mait aser khuret itemji aremzüka tila küma Tsüngrem tenzükba tetezü nung jemi ta angateter.

Asenok ajaki metet Alar ta asüba ya tanganütsü o tajung ka masü. Tanü Tsüngremer Wadang nung shir noktaka lir, parnokji Tsüngrem tenzüksü aser Pa chir ama alitsü aja ta angateter. Anungji tang nungjibo sayutsüngidang, Tsüngrem O jembidang osü melenshia Tsüngrem Lar ta masü saka Tsüngrem tenzükba ta jembitsü asenok ajaki merangdi ta ayongzük.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Myanmar kübok Chin State nung Khristantem maneni ajener



Myanmar kübok Chin State nung Arogo kati Khristan refugee tem jenokdakja mesüba noksa nung angur.

October 01, 2021: Myanmar kübok Chin state nung ano rara tesashiba akümba ajanga Khristan 1000 junga jena oa Tenla kitem nung jenokogo.

Myanmar sepaitemi civilian amakba ajanga Mindat jila nungi nisung aika ajen; kasa jila nung putir ki ka, convent ka aser boarding school ka raksatsüba den külemi civilian ki aika raksatsüogo, ta Khristan kati metetdaksü.

Tetsür aser tanurtem timba ser Khristan 150 shi Magwe division kübok Kyaukthuh jila nung aliba Catholic Arogo Tenla ki compound nung jenoka lir aser Khristan 100 shi Buddhist monastery ka nung jenoka lir. Mindat aser Kyaukthuh jila na ya Hakha Arogo kübok lir.

Arogo nung tenzüker Mang-i, Arogoi parnok nem tejenokdak aser chiyungtsü agütsür aser Caritas Myanmar-ia parnok nem tejenokdak aser chiyungtsü agütsütsü atema

sentong yangludar, ta metetdaksü.

Osangbener den jembidang Mang-i, "Tang Tenla kidang aser monastery ka nung jenoka alirtemji tang agi tanabenbuba jena arurtem lir. May ita nunga Mindat jila nung rara adokba mapang nung parnok Tenla kidang jenoka liasü," ta metetdaksü.

May ita nungi tenzüka Mindat jila nungi jenshir nisung 10,000 shi Tenla kitem, sükitem aser kinüngertem kidang jenoka liasü aser iba nungjagi nisung 4,000 shibo kidangi meyipa ogo saka tanünga 6,000 bo tang tashi Tenla kitem, sükitem aser kinüngertem kidang jenoka lir, ta Khristantem metetdaksü.

September 18 nüa Thantlang jila nung sepaitemi Baptist pastor ka densema Khristan kar tepset aser ki aika raksatsü aser nisung aika jenshia liasü.

May ita nungi tenzüka Chin state nung telok balala aser

sepaitem tsünga rara sashia tenzüka sülen Chin state nungi nisung 16,700 dak tema jenshiogo.

Khristan nütsünga aika aliba state tem- Chin, Kayah, Kachin aser Karen state tem nunga rara ajanga nisung 206,000 dak tema jenshiogo aser tang linük nung nisung million 3-i teyari balala nüngdaker, ta UN-i metetdaksü.

September 29, 2021 nü UN secretary-general, Antonio Guterres-i alima linüktem dang Myanmar tensa atema longjemer inyaksü ayongzüko.

"Myanmar nung democratic sorkar amenoktsü atema alima linüktem aser region nung aliba linüktemi rongdak süa longjemer inyaksü nüngdak," ta Guterres-i metetdakja liasü.

Taküm February 1 nungi sepaitemi Myanmar yimsüsüba tenzüka sülen nisung 1,146 shi tepsetogo aser nisung 8,000 shi puogo.

Home Ministry-i Harvest India indang FCRA license agientsüogo

October 01, 2021: India nung Khristan missionary organization- Harvest India indang FCRA license agienogo; iba organization-i bendanglen nungi senotsü teyari aika angur, aser iba senji amshia India nung timtemertem yaria tenzüker.

Bodhbarnü Union Ministry of Home Affairs-i Christian missionary organization 'Harvest India' indang foreign funding license agien; parnoki Foreign Contribution Regulation Act (FCRA) 2010 ozünga alema inyakba agi licence agientsür, ta sorkari metetdaksü.

Tawa NGO watchdog-Legal Rights Protection Forum (LRPF)-i, Harvest India-i FCRA ozünga alema inyaker aser iba telok nung tongti, Suresh Kumar-i tamangba yimsü meyipdaksüba nung shilem agir, ta tai tonglokja liasü.

September ita tetenzüklen LRPF aser SC-ST Rights Forum-i shidi ka ajanga National Commission for Scheduled Castes dang Khristan putir ka süaka reservation tajangzüki agitsü atema Suresh Kumar ket nung Scheduled Caste

certificate ka aliba atema pa anema inyakang, ta mepishia liasü.

Harvest India-i linük tesem balala nung community centres 1500 shi lapoka lir aser item centre nung nisung aika Khristan yimsü dangi meyipdaksür. Iba dak alia iba organization atema inyaker pastor 1500-2000-i tamangba yimsü meyipdaksüba nung shilem agir, ta LRPF-i tai tongloktsü.

Harvest India-isa 'Crusade' sentongtem agir aser Khristan yimsü dangi meyipdaksüba sülen sayutsüngir akümtsü atema training agütsür. Kumar aser pa kinüngtsü natisa King's Temple ta ser Arogo ka tenzüka lir aser Bible college aika lapoka lir, ta parnokisa tai tongloktsü.

Tawa LRPF-i shidi ka ajanga Ministry of Home Affairs dang Harvest India aser Kattera Suresh Kumar-i tiyazü nung bendanglen nungi senotsü teyari meshia agiba atema parnok anema inyaksüla, ta mepishia liasü.

2017-18 aser 2019-20 kümtem nung Harvest India-i bendanglen nungi sen crore 19.6

ngua liasü aser item senji missionary mapatem atema amshi.

LRPF-isa, Harvest India-i item sen nungjagi pastor tem nem itasen agütsüba den Tenla ki maintenance nung amshio, ta metetdaksü.

2018 küm US nung Mission Conference nung jembidang Suresh Kumar-i, "Tang onok Hindu nung yimsüsüba kübok lir. Ozü Ato kilonser ya nisung tamajung. Pai India nung Khristan ka danga melidaksüner. Pai India ya Hindu linük ka kümdaksüner. Tesüiba küm pongu tsünga pastor aika tepsetogo aser missionary aika meyipa yokogo," ta jembia liasü.

Taküm küm kija nunga sorkari Harvest India densema organization 10 indang FCRA license agienogo. Tamalena Evangelical organizations- People's Organisation of Empowerment of Tribals & Heavenly Grace Ministries aser Russ Foundation & Commonwealth Human Rights Initiative indang FCRA license agiena liasü.

ANOGO ABEN TSÜNGREM DEN

TSÜNGREM SENTSÜWANGSHI TASHI TULU

Ne nung sentsüwangshitsü asoshi onok yariang Oh ozü kümtetba Tsüngrem, onok kümzü kang, aser ozü menen tokang.

~ T. Ken 79:9.

Tsüngremi kangasa meimbaji, meimchir taküm ya lir. Kechiaser Pai asenok ya Pa mesükba nung yanglu, Alima ajak Pa tashi nung ajemdaker ketdang asütsü asenok nem nungloktsü. Saka asenoki tashi manga, Tsüngrem den-ang toktep, Tsüngrem ain adok, pai asenok ya meshi-meshia mesamatsü, saka tasüba yok. Tasüba aruaka asen Tsüngremi asenok Tanela kümzü jenjang sentsüwangshi nung yanglua agütsü. Tekümzü kangba tashi agütsüba ya asenok meimchir asoshi sempet rongnung ka lir. Tsüngremi asenok kümzü kangba lenmang nungji, asenoki dang ochi shia asen tai temenentemji nangzü kra, ano pai asen menen adokba ya Pa sentsüwangshi tashi.

Temeim adianutem, Tenüngsangken zülusangi ayimdenner, O Kibuba onok yariang! Asenoki iba tanela O nungya ajemdaker, asen tamang tashi agi asen Tsüngrem dang asen ali shih aser tanela nung taneptsü meshia, O kibuba. Ni yariang ta asenoki ayimdentsüla. Kechiaser asen Tsüngrem Sentsüwangshi tashi tulu lir.

SARASADEM

O kibuba Yisu, onok ali shih, tanela nung Nai kümzü kangba asoshi Ne dang pelar. Amen.

Reshikangshi liaka Afghanistan nung Khristan yimsü indar

October 01, 2021: tanurtemji tarutsü nung linük Afghanistan nung reshikangshi lenirtem lir aser parnoki Yisu tialia liaka Afghan nungger aikati indang tali metetner," ta Rogers-i ashi.

Ano iba program repranger Afghan nungger katibo ministry counseling team dang pai atangji Yisu Khrista ajuruner, anungi Pa kong lir, ta asüngdanga liasü.

"Hopta ka shi lir kasa nisungba jagi lanur 25 anisemer aru aser parnok ajak jagi Yisu indang metetnua liasü," ta Rogers-i ashi.

Iba sülen hopta ka shi lir ano nisung 50 shi arua Yisu indang asüngdanga liasü.

"Satellite aser social media ajanga tangari mayimjemba tesem ajak ayimjemmer. Iba ya ajanga osangtajung aser Khrista temeim lemsatepteter," ta pai ashi.

Iba ministry-i Afghanistan nung Khrista mesüka Pa sülen anidaker kaka kümdaksütsü nükjidong nung inyaker. Afghanistan nung dang masü saka reshikangshi aliba Khristantem atsüksüsa tesemtem nung parnoki kümogo, ajisüka Afghan rangloker inyaker.

OLONG PAITEP # 5954

1		2		3		4	5			
				6						7
		8								
9				10		11				
			12					13		
						14				
16						17				

- | | | | |
|----------------------------------|--|--------------------------------------|--|
| TIPILEN | | LANGTSÜNGLEN | |
| 1. Nisung jenti - (5) | | 1. Tenük telong - (9) | |
| 4. Tsük rudenba - (5) | | 2. Committee dang ajar - (5) | |
| 6. Temzüng tesashi - (5) | | 3. Yagi ki okdoker - (7) | |
| 8. S _ _ _ i - (3) | | 5. Yim lenmang - (5) | |
| 9. Nisung telemsa - (3) | | 7. Temoatsü keter meyipa aruba - (9) | |
| 10. Anogoshi - (4) | | 11. Kanga junga menemba - (7) | |
| 12. Ajanga aor - (4) | | 12. Majinü - (5) | |
| 13. Tsük rizüngdak - (3) | | 13. Tzüma nung senzüba - (5) | |
| 14. Tebang nungi adokba - (3) | | | |
| 16. Süngdong tatembangtiba - (5) | | | |
| 17. Meputep - (5) | | | |

OLONG PAITEP # 5953 TELANGZÜBA

- | | |
|---|--|
| TIPILEN : | LANGTSÜNGLEN : |
| 2. Bangsemo, 6. Tiptem, 8. Jen, | 1. Yipten, 3. Nüja, 4. Sangro, 5. Milen, |
| 9. Talila, 11. Aren, 12. Tzübo, 14. Alia, | 7. Tulu, 10. Laza, 11. Aben, 12. Tiyong, |
| 16. Angati, 17. Odi, 18. Azü, | 13. Ajizük, 14. Aitsü, 15. Tasa, 16. Aina. |
| 19. Sünglang. | |



2021 SEPTEMBER ITA LILI RESULT !

September ita nung Lili tajungtiba (First) shimteta tanü yangi lephsia agütsür. Lili zülur-i October 10, 2021 tashi nung Tir Yimyim Office nungi senpet agizütsü mepishia metetdaksür.

NÜBENER TABU ALOKBA TIMTEM NUNG :

- Alokba tanur tenet sor ti buba asodang tenüng ajatsü ratar.*
- Sobangba** : Temba, tanur talakbajia tenüng kechi jatsür?
Alokba : Haeet, joko tenünga jamar kechianga mepurariji Tatemliba ajar ako, tetezü tatemsa ati.
Sobangba : Very good.
(Tesangküm jia tetsür chanu ka asor)
Sobangba : Aree, temba Tatemliba sülen tobo joko masotsüang ta alinung ano ka aso?
Alokba : Ayayaya, temba, by mistake tanglokba ati.
Sobangba : Achha, süra tenünga shiba ajar jalaji?
Alokba : Joko kechianga majarji Anobenla ajar ati!
Sobangba : Wow, wonderful temba Alok!!
- Lilir : WhatsApp

TANÜBO NAI LANGZÜANG

- Q. India indang mezüng Solar Mission ji koba?
 A. Mangalyaan B. Vikram
 C. Aditya-L1 D. PSLV?C51/Amazonia-1
- (Taruba adok nung onoki langzüsü)
- YASHI ADOK TELANGZÜBA : AC001**

AO OSHI ANGAZÜKDAK:

- TANÜ ANGAZÜKTSÜBA OJANG**
- Laktet**
 (v) talubo asüba agi mechinüi mesüra maginüi akümba (fed up)
 * Benjong nung shi agi **laktet**.
- Laküm**
 (n) kor tebang nung lisü sentakba merang (bridle)
 * Kor nung asangertemi **laküm** lisü amshia kor anishir.



Happy Birthday

TENÜNG : MOLI JAMIR
 Tasoba anogo : 2nd October
 Küm : 3 yrs
 Talidak : Lakeview colony, Dimapur
 Tsüngremer tauchi agi Moli Jamir küm 3 (asem)tashi arishi den anema yutsüba asoshi tulusang teyanglur tenüng kanga tushir. Tsüngremer maneni Moli kasa temoatsü nung len aniangni ta tanü onoki na asoshi sarasademtsür.
 HAPPY BIRTHDAY MOLI
 -Temeim Oba, Oja & Oden Jamir



TENÜNG : KILANGZULU JAMIR
 Tasoba : 2nd October 2013
 Class : 2
 School : G. Rio School, Kohima
 Talidak : Paramedical Kohima
 Semchir Kilangzulu Tsüngremer tanü tashi arishia anema yutsüba atema kanga pelar Tsüngrem tenüng asanger. Maneni asen teyanglur Tsüngremer semchir Kilang anema aliba den arishi talang moajang ta sarasademtsür.
 -Otsü, obo, Khumda, Oja, Oba, Onu & Oko



SUDOKU # 5995 TELANGZUBA # 5994

5	6			2			4			1	5	4	6	9	2	3	7	8
8	3	7		1						7	2	3	1	5	8	6	9	4
2		1		6	9		3			9	8	6	7	3	4	1	5	2
	9						2	5		2	4	7	5	1	6	9	8	3
6	8	2		5	1					8	6	9	3	2	7	4	1	5
	7		8		2	1		9		5	3	1	8	4	9	7	2	6
3				7	4		8			3	7	2	9	6	5	8	4	1
	2	4	5				3	1		4	1	8	2	7	3	5	6	9
7		8	2	9	3					6	9	5	4	8	1	2	3	7

OJANG LUTEP # 5540

- CHKEI :
- ENTSA :
- ARUJUJAR :
- NIASE :
- METETA :
- ALMI :
- ANGNUJI :
- TITE :
- REMENA :
- ATSALIÜL :

OJANG LUTEP TELANGZÜBA # 5539

MASHISHI DANG YUTSÜBA MAPAJI AGINÜBA AMA KODANGA TAKOK NGUA MEINYAKTETSÜ

TAN HOPTA ATEMA - KOMA SÜLA ?

Q. Nagaland nung kechà telokia menokdangi gari totzü bushia atsütetba mapatem tenzükdaksü nunga koma süla ?



October 01, 2021 nü Parliament House, New Delhi nung Union Ministers- Sarbananda Sonowal aser L Murugan nati Rajya Sabha züngsem tenangzükba agiba sülen tangokba noksa nung angur. Kasa noksa nung Union Minority Affairs Minister Mukhtar, Abbas Naqvi aser Rajya Sabha (RS) Chairman, Venkaiah Naidu nata angur.

India nung Covid agi teshirangdakpur 2,75,224 dang kümogo

New Delhi, October 01 (Agencies): India nung ano nisung 26,727 dak coronavirus putet aser iba tashidak agi shiranger 277 asü, ta Hokolbarnep Union health ministry-i metetdaksü.

Tang tashi nung iba tashidak agi shiranger shilem 97.86 anepogo aser ibaji yaküm March ita nungi tenzüka tang tashi nung shilem timtiba lir.

Tesüiba ghonda 24 tsüingda linük coronavirus putetba nisung 26,727 aser iba tashidak agi asür 277 nungji Kerala kija nungi nisung 15,914 aser asür 122 densema lir, ta Health Ministry-isa metetdaksü.

Tesüiba ghonda 24 tsüingda coronavirus agi shiranger 1,796 ajema kümogo aser tang teshirangdakpur 2,75,224 dang kümogo, aser ibaji coronavirus caseload nungi

shilem 1 dang lir. Tang tashi nung India nung coronavirus agi shiranger 4,483,39 süogo, ta Union ministry of health & family welfare-isa metetdaksü.

Brihostibarnü samples 15,20,899 tendanga liasü aser tang tashi nung samples ajak senteper 57,04,77,338 tendangogo, ta ICMR-i metetdaksü.

Tang anogo shia coronavirus positive putetba shilemji 1.76 lir aser hopta shia positive putetba shilem 1.70 dang kümogo, ta ministry-i metetdaksü.

Benjung mongpu atongtsü anasa Hokolbarnü All India Institute of Medical Sciences (AIIMS) director, Randeep Guleria-i nüburtem dang, linük nung benjung mapang ano wara tali proktsüa akok, anungji ajaki kümdanga alitsüla, ta metetdaksüogo.

"Benjung mapang nung asenok ajaki kümdanga alitsüla. Asenoki taruba hopta 6-8 ji kümdanga lira coronavirus wara kanga ajema akümtsü," ta pai metetdaksü.

Dusshera, Diwali aser Chhath puja densema benjung aika atongtsü lia AIIMS Director-i iba o ya jembio. Benjung mapang longsolongbenba agi coronavirus wave tasembuba tenzüksü ta mongintema aikati ashir.

Tamalen Niti Aayog züngsem, Dr VK Paul-ia wara anema raratsü atema benjung mapang nung kangabo longsolongben masütsüla, ta metetdakja liasü.

Dr. Paul-i, "Covid wave tasembubaji October-November nung tenzüksüa akok, ta mongin aikati bilemer, aser ita ana ya benjung mongpu mapang lir," ta metetdakja liasü.

Cyclone Shaheen ano tesashiba akümtsü: IMD

Mumbai, October 01 (Agencies): Arabian Sea nung aliba yipru ano tesashiba küma Hokolbarnep tashi nung Cyclone Shaheen kümtetogo aser nikongdang tashi nung ano tesashiba akümtsü, ta Hokolbarnü India Meteorological Department (IMD)-i metetdaksü.

Iba yipru ya India nung tziyümkümlen nungi ainshidar, ta IMD kübok Cyclone Warn-

ing Division-i metetdaksü.

"Cyclone Shaheen ya north-east Arabian Sea nung lir aser west-northwest tsütsüleni ghonda ka nung kilometer 20 shi kera odar," ta parnokisa metetdaksü.

"Taruba ghonda 12 tsüingda iba yipru ya ano tesashiba akümtsü aser taruba ghonda 36 tsüingda Makran tziyümkümlen (Pakistan) süitsü. Iba sülen west-southwest tsütsüleni oa

Oman tziyümkümlen süitsü; iba sülen ang yipruji süngjemtsü," ta IMD-i metetdaksü.

Cyclone Shaheen ya Cyclone Gulab nungi kümtetba lir. September 26 nü Cyclone Gulab agi India anüdoklen tziyümkümlen kongshia liasü aser iba yipru agi Telangana, Chhattisgarh, Maharashtra, aser Gujarat kongshidangbo süngjemadoker liasü.



October 01, 2021 nü Jhajjar nung Haryana Deputy Chief Minister, Dushyant Chautala-i o jembitsü aliba sentong ka jakdang aluyimertemi longkak aitba noksa nung angur.

Shringla-i Sri Lanka semdangtsü

New Delhi, Mongputeni/October 01 (Agencies): Foreign Secretary, Harsh Vardhan Shringla-i October 2-5, 2021 anogotem nung Sri semdangtsü; Sri Lanka Foreign Secretary, Admiral Prof. Jayanath Colombage-i jaokba nung ajemdaker pai iba linük semdangtsü, ta Hokolbarnü ketdangsertem osang ka ajanga metetdaksü.

India nung 'Neighbourhood First' policy nung Sri Lanka ya tongti linük ka lir. Foreign Secretary-i Sri Lanka semdangbaji linük anaprongla atema lenla aika nung kanga tongtibang asütsü, ta Ministry of External Affairs sangdong ka ajanga

metetdaksü. Foreign Secretary-i Sri Lanka semdangba ajanga India aser Sri Lanka na tsüingda tesendaktep reprangshitsü atema maongka anguba den külemi linük ana sentep projects aser covid wara anema longjemer raraba jenjang asadangtsü atema maongka angutsü.

Taküm küm tetenzüklen India-i Neighbourhood First policy kübok Sri Lanka nem coronavirus vaccine aika agüja liasü.

India-isa kidanger linüktem- Bhutan, Maldives, Nepal, Myanmar, Afghanistan aser Bangladesh nema kasa policy kübok coronavirus vaccine angati agütsüogo.



October 01, 2021 nü New Delhi nung Colombia tatong Tir aser Foreign Minister, Marta Lucia Ramirez-i India tatong Tir, M Venkaiah Naidu ajurua senden amendang tangokba noksa nung angur.

Linük nung opposition tashi itta alitsü tongtibang: Shanta Kumar

Dharamshala, October 01 (Agencies): Taoba mapang Himachal Pradesh chief minister aser BJP lenir tain, Shanta Kumar-i, linük yimtenren nung shilem junga agitsü atema Congress-i Gandhi kibong dak dang memetaloktsüla, ta ashi.

Hokolbarnü pai, Congress ya yimtenren nungi meshimeshia samara India nung democracy nung linük opposition malitsü, ta ashi.

Dharamshala nungi sangdong ka ajanga BJP lenir taini, Congress party ya kanga tongtibang aser linük nung BJP sülenbo nation party ji Congress dang lir, ta metetdaksü.

"Democracy talongtsüji ana lir. Ka ruling party aser kaji opposition party lir," ta Kumar-i ashi.

Linük nung party tejentiba ya mapang ka nungbo Nehru, Gandhi aser Patel nungi ania liasü, saka tangbo iba party ya asayamenü party ka mesüka kümogo, ta pai ashi.

Kumar-isa Ato kilonser, Narendra Modi-i lenisüba tajung agütsür, ajisüaka linük nung opposition tashi itta alitsüji kanga tongtibang, ta ashi.

"Atal (taoba mapang Ato kilonser Atal Bihari Vajpayee)-i, asenok party telung sasep nung ang malitsüla ta jembia aruogo. Ibayongji tanü ni iba o ya jembir," ta paisa ashi.

Arrshi küm 87 Kumar-isa, Congress shirangba atema

treatment ji 'Gandhi'er alar tia nungi adoktsüla, kechiyong Congress nungji linük lenir asütsüsa aika lir, ta ashi.

Paisa taoba mapang Punjab Chief Minister, Amarinder Singh dang Congress party metoktsütsüla saka Ghulam Navi Azad, Kapil Sibal aser Shashi Tharoor nung ama G-23 lenirtem den senden mena Congress party nung nüchiso atema raratsü aser kibong ka talenba nungi salatsü atema inyaksüla, ta ashi.

Kumar-i 'G-23' ta tetshiba telok ya Congress nung asüingsashi tulu alitsü atema tamalen Sonia Gandhi dangi shidi zülur Congress lenirtem lir.

Punjab Congress telung nung mapang talangka mangatettep adoka aruba sülen September 18 nü Congress lenir, Captain Amarinder Singh-i Chief Minister menden nungi anena liasü. Sangküm Punjab nung Assembly elections agitsü lia pai CM menden toktsü.

Singh-i CM menden toktsüba sülen anogo ka dang lirbo Punjab Chief Minister menden atema Charanjit Singh Channi shima liasü.

Anogo ana tejaklen Singh-i Amit Shah ajuru aser ibaji ajanga pai BJP nung adentsü ta aikati bilem, ajisüaka Singh-i pa BJP nunga madentsü aser Congress-a toktsütsü, ta metetdaksüogo.

Anentsüh nung nisung 7 asü; ka kumzük



Jakarta, Mongputeni/October 01 (Agencies): Indonesia indang Sumatra asetkong nung yipru tesashi dener tzunglu kanga sashia aruba ajanga anentsüh alua nisung tenet takum saka, aser tzunglu maneni aruba ajanga lendong timtem tali ajurutsü, ta ketdangsürtemi Hokulbarnü metetdaksü.

Bodhbarnü Padang Pariaman district nung anentsüh agi ki ana nung kongshir anogo ka lir molushi nungi nisung tasü mang tenet atsüteta liasü aser nisung ka teret sükdanger takum

kumzük.

"Yashi nikongdang onoki hadir tulu amshiba sülen iba lendong ajurur alirtem ajunga ya ngutet," ta yangji aliba disaster mitigation agency nung ketdangsür kati Hokulbarnü ashi.

Ketdangsürtemi nüburtem dang saksalema alitsü metetdaksüogo, kechiaser iba tesem nung tzunglu tesashi ya Honibarnü tashi arutsü lir.

"Tzunglu ajanga ali nung lendong timtem agütsüba nungi jembua liang," ta National Disaster Mitigation Agency indang odongtar

Abdul Muhari-i Hokulbarnü sangdong ka nung ashi.

Mopung tesashi aonba ajanga ki-ojen aser gari raksatsü aser süngdong laodaksü.

Bodhbarnü nisung kar leper ka semdangba mapang parnok dak süngdong ka laoba lendong nung nisung ka asü aser pezü yirua liasü.

Yangji aliba ketdangsürtemi anogo 14 atema state of emergency sangdonga lir aser arok atema sorochiokba tesemtem lapokogo.

West Sumatran provincial yimtiba, Padang nung tzunglu kanga sashia arua tzümet süng adokba sülen nisung 400 dak tema yimti nungi anizüker ogo.

Tzungluruwa mapang Indonesia tesem ajungalen anentsüh alir aser ajungben tzümet süng adoker, koba Sumatra nung September ita tenzük.

Arem mürektetba aser yimti junga meyangluba ajanga lendong ya mapang shia ajurur, ta libajen asadanger temi ashir.

Taküm April ita Indonesia anüdoklen asetkong aser anasa aliba Timor Leste tesem nung Tropical Cyclone Seroja agi kongshia nisung 200 dak tema takum samatsü.

Ita 18 sülen Australia arütsü November nung lapoktsü

Canberra, Mongputeni/October 01 (Agencies): Temelaba melie nüburtem bendanglen mesenzütsü tenokdangba agütsür ita 18 lir Australia indang arütsü tanaben lapoktsü, ta ato kilonseri sangdong. Iba tenokdangba ya ajanga Australia nung meyririjang aika bendang lima nungi maruteti lir.

Australia nung temsüa alir shilem 80 nem COVID-19 mozü agütsütsü nükjidong ayuba hopta ishika tsüngta tongtetba sülen nüburtem kidangi meyipa shilangtetsü aser bendangleni aotsü akoktsü, ta Scott Morrison-i Hokulbarnü osangbener senden ka nung metetdaksü.

"Australia nung nem parnok takum meyipa agütsütsü mapang tonga aruogo. Iba atema asenok renemer, aser yakta Australia ayamesotsü," ta Morrison-i ashi.

Danga state tem dang nungi tama New South Wales (NSW) state nung vaccine agir shilem 80 ajungtsü amai lir, aser Australia nung linük yutsür aotsü atema tendangba tesem ka amai akumtsü akok, ta ketdangsürtemi ashir.

"Kanga kumdanga aser sentong yanglur mera agütsü," ta Finance Minister Simon Birmingham-ia osangbener dang ashi.

Tang sorkari arütsü ya Desember 17 tashi shibanga ayutsü ozüing agüja lir. Saka tang telemtetba tasen agiba ajanga tenokdangba ya ita ka jelia agientsü.

Sydney Morning Herald ajanga ashiba agi, Home Affairs department-i Australia nung 210,679 shi bendangleni aotsü melaogo aser application 122,131 magizük.

Kibongtem continent balala nung prokshia lir, sensopur bendang lima nung lir aser bendangertem linük yutsür moteti medemer aser kinungertem majuruteter.

Vaccine course ajunga agir aliba Australia nungertem November ita nungi sen aika lalua hotel nung quarantine mesü daksütsü.

Iba melena parnok linüki meyipa shilangba sülen peikidang anogo tenet quarantine asütsü.

Vaccine magi aliba Australia nungertem hotel mesüra tesem kar shimteter yangji anogo 14 quarantine südaksütsü.

Manny Pacquiao-i Philippines tir atema nomination agütsüogo

Manila, Mongputeni/October 01 (Agencies): International boxing champion, Manny Pacquiao-i Philippines tir atema tokteptsü asoshi tenüing agütsüogo, aser linük nung election season tenzüker, kong television nung nungtugu nisungtem, yimten yimsüsür aser tepuokdak alir ka densema candidate meyririjang aikati menden balala atema tokteptsü.

Tir atema Hokulbarnü tenüing agütsüba mapang Pacquiao-i nüburtem aoksaja taoba mapang Manali Mayor inyaka alisang aser tang House of Representative züngsem Lito Atienza ya pa indang tatong tir atema tokteptsü sangdong.

Tena tenüing agütsür aruba mapang tena indang kinungertemi meina arua liasü.

Philippines indang election ya aiben yimtung nung amungba benjong den medemdang, koba ita aika agütsü, aser COVID-19 tashidak wara liaka candidate balala busemertem Hokulbarnep yimtung nung adoka nisan ayipshia campaign banner tem amer liasü.

Tenüing agütsüba maparen ya October 8 tashi alitsü aser iba mapang tir nungi tenzüka town council züngsem tashi menden 18,000 dak tema


asoshi candidate meyririjang aikati tenüing agütsütsü imlar,

Tir Rodrigo Duterte melener ya May 9, 2022 ballot nung shimtetsü aser iba atema nisung million 64 dak temai vote agütsütsü amanger. Tir Rodrigo ya küm trok indang kümsük tanabuba tir inyaksü constitution agi memelar.

Saka Duterte-i tatong tir atema tokteptsü sangdonga liasü, koba taoba mapang majangshidangba ka lir. Pa indang odongtar Harry Roque-i ashiba agi, tir-i pa indang tenüing agütsüogo. Saka pai mapang tatsüka lir tenüing meyupa agütsü amai kari jembir. November ita tiyong tashi nung tenüing melentetsü akok.

Tang tashinung Philippines tir atema tokteptsü nisung asemi sangdonga lir, aser item rongnung nungtugutibaji Pacquiao ya lir. Senator Pacquiao-i tir atema tokteptsü nung temolung agütsütsü mechi tan hopta boxing wadang nungi anena liasü.

Pacquiao ya tang yimsü tesü dang PDP-Laban party nungi lir, kong Duterte ya tekolakba lir, Saka tena tsüngta mangatetep adokba ajanga Pacquiao ya regional party ka kübok nungi tir atema tokteptsü. Ajsüka iba yongji tang yimsü tesü dak party ya telok ana



sadanger lir.

Taoba mapang actor alisang aser Manila Mayor Isko Moreno, taoba mapang Philippines police tekolakba inyaka alisang Senator Panfilo Lacson natia tir menden atema tokteptsü sangdonga lir. Tang tashinung tir atema tokteptsü sangdonga alir candidate asemprong ya taoba Duterte den külem party nung liasü.

Saka Tir Duterte'er jala Sara Duterte-Carpio dak aikati rangloka lir, saka laibo taruba küm tir election nung shilem magütsü, ta ashir.

Duterte ya Philippines tir akumba mapang arishi küm 43 tain Duterte-Carpio-i tebu melena Davao City mayor menden nung amen aser la ya tir atema nübu tejangatiba ka amai opinion polls ajanga sayur, saka tawa la jenjang tera tajemba kumogo.

Duterte-i 2016 küm nungi tenzüka temesepba mozü anema rara arudang nisung meyririjang aika tepsetba atema linük nung aser International Criminal Court ajanga ken o benoktsü tensa ka nung lir, aser pa kumzüksü atema temelener ya par telok nungi alitsü tongtipang, ta aikati ashir.

Pai tatong tir atema tokteptsü merangba ya yimtenren nung pa tejangraba inyaksü atema lir, ta pa anemertemi ashir, saka Duterte-ibo tashi atema masü saka nübur tenzüksü temolungtetba nung lir, ta ashir.

Duterte-Carpio yagi October 8, 2021 tashinung tenüing magütsüaka 2015 küm tebu inyakba ama November 15 tashinung la tenüing agütsütsü.

Vice President Leni

Robredo, shibai opposition anir lir, la ya tir atema tokteptsü asoshi lar teloki ajungshia liasü.

"Linük asoshi telemtetba tajung agütsü atema aruya aliba anogotem nung ni asoshi sarasademjangma," ta lai ashi.

Philippines nung tir aser tatong tir ya balala shimteter, anungji aiben party balala nungi candidate tem külemi inyaksüsa akumer aser Duterte aser Robredo na ama maparen balala nung mangatetep adoker.

Iba linük election nübuyim ya kanga longso-longbena alir aser nübu atsür arutsü atema tokteptsü temi nungtugu nisungtem amshir.

Candidate temi nübuyimba mapang sabang nung pei sempet amshia ken atener aser tsüingsanger.

Philippines nung candidate ka Senate nung tanaben tokteptsü asoshi tepuokdak tesem nungi nübuyimtsü sangdongogo aser iba tenüing Senator Leila de Lima alitsü. Leila de Lima ya mapang talangka nungi Duterte anemer liasü saer temesepba mozü dak sendakba nung tai tonglokja 2017 küm tepuokdaki yoka liasü, saka la ola madokdaksütsü mechi iba mapa ya inyak, ta la busemer temi ashir.

Tanurtem Covid-19 nungi kümzüka ayutsü asoshi teinyaktsütem

Dimapur, Mongputeni/ October 01, 2021 (TYO): Tang, COVID-19 wara agi arishi küm 18 tekübok tanurtem dak melungi kongshidar, saka ibaji ajanga tanurtem kanga mejungi kangshiba/shirangbabo mali. Ajisüaka, tarutsü anogotem nung, iba Virus indang variant tasentem kanga tesashi asütsü mesüra kangarabo lendong masütsü ta shingai asadangtsü mesüra ashitsü makok.

Arishi küm 18 tekübok tanurtem atema vaccine ka madok tashi, tsüraburtemi pei chirnurtem atema Covid-19 dak sendakba tekümdangtsü mera ajak agitsüla.

Anungji, tanurtem Covid-19 wara nungi kümzüka ayutsü mechi tsürabur/terepranger tem atema teküboklen agüja aliba meratem kar metetdaksüür.

1. Tsürabur/Terepranger/ Teyariteper/Anepalur temi kechi inyaktsüla?

- Arishi küm 2 ser tema tanurtem dang tzu temerük aser sapon agi second 20 shi teka jung junga metsükdoktsü, tangar nungi süklep (feet) trok pilar jembishinütsü sayatsüla aser tanurtem asoshi asaya mapang atakzüka yutsütsüla.

- COVID dak sendakba mera tapet agia arishi küm 2 tekübok kinü tanurtem nem maneni mamatzü y o n g d a k t s ü t s ü l a (breastfeeding).

- Tanur ka arishi küm 5 dak tema süra, parnok dang teti kima yimdong nung senzüdang tejak nembangba mask inoktsü sayatsüla/ashitsüla.

- Mapang shia mesüra teti kongshiba tesem, kazütsü tem anogo nung khenbo sodium hypochlorite shilem 1% amshia merükang.

- Akok tashi tanurtem dang kidang/kilung nung, angazükba inyakyimtem aser maparen tem inyaktsü sayuang.

2. Koba mapang tanurtem dak COVID lir ta metetta akümsü?

Covid-19 wara temaitsütem tain aser tanur dak kasa dang, kong temang meta shirangba mesüra süksena aita shirangba, aketba, teni atangba mesüra neptzü ayimba, chiyongtsü nanga mechitetba mesüra junga memenemetba, tango junga magitetba mesüra tango sashitsü timtemba, tepok perepa aoba aser chiyongtsü chinüa maittsü.

3. Tanurtem dak teküboklen agüja aliba timtem kar dang lira, parnok kanga anepalutsüla.

- Malnutrition, tangar

memenep mesüra matamabensar tem, timtem talisa HIV, underlying cardiac, temesen, tezüngjang timtem.

4. Kidang (home isolation) shirnok anepalutsü akok?

- Asymptomatic mesüra tanurtem dak iba tashidak temaitsü terara aliba talisa-terok ashiba, aketba timtem kidang anepalutsü akok.

5. Kidang (home isolation) tanurtem anepalutsü yimyatem.

- Tsürabur/Terepranger temi maoksatsüla, iba tashidak temaitsü tem yakta metetra, timtem timbaka kidang anepalutetsü akok.

- Na aliba tesem nung ASHA/Covid dak sendakba maparen nung inyakerkem dang osang metetdaksütsüla.

- Mopung sadema tukuba/aitba takdang ka nung tanur ji (shiranger) anepaluang.

- Home isolation mapang, arishi küm 5 tekübok tanurtem tetsü mesüra terepranger temi repranga anepalutsüla.

- Kidang aneplautsü mekokra, ana meta aliba COVID Care Centre-i tanurji anir aotsüla.

6. Teküboklen agüja aliba tetuyubatem nung anidaka tanurtem reprangtsüla:

- Anogo nung anaben-aseben tashi respiratory rate züngdangtsüla.

- Tango sahsidang teko teküboklen arakzüka yimya reprangtsüla (chest indrawing).

- Temang dak sendakba shilem tem mekong mekong küma aoba metettsü asoshi teka agi kongshia tendangtsüla.

- Anogo nung ghonda pezüzü sülen temang nung Oxygen level tendangtsüla.

7. Kidang iba wara temaitsü agi shiranger tanurtem anepalutsü asoshi:-

- Temang meta shirangba atema: Paracetamol 10-15mg/dose agütsütsü akok (4-6 hours interval).

- Aketba atema: Tainlonglong tanurtem tzu nung metsü (salt) inoker terok shidokdaksütsü (gargle) akok.

- Tzü aser chiyongtsü: Temang nung tzu peria lidaktsütsü asoshi oral fluid agüjang.

8. Kidang tain ka shirangra kechi inyaktsüla?

- Mopung sadema aitba takdang ka nung anepalutsüla.

- Akok tashi tanur/chirnur nungi pilar alitsü merangang.

- Teti triple ply mask mesüra N95 mask inokang.

- Chiyonga - jemba auso aser marok, temang aidokba towel balaka amshiang aser itemji balaka shidokang.

- Temang mejungi aoba pei sasa tendangtsüla, phone mesüra video call ajanga adianu aser medemer tem den jembiang.

- Akok tashi tzu aika jemang.

9. Temang nung teküboklen agüja aliba timtem kar dang lira yakta doctor den tongtepratepang.

- Agüja aliba Respiratory rate dang nungi timba kümra -

Ita 0-2 tanurtem dak >60/ min.

Ita 2-12 tanurtem dak >50/ min.

Arishi küm 1-5 tanurtem dak > 40/min.

Arishi küm 5 dak tema tanurtem dak > 30/min.

- Natzü/tayi endokba 0.5 to 1.5 cc/ kg/hour dang nungi tajemba süra.

- Oxygen saturation shilem 94% dang nungi tajemba kümra.

- Temperature 100.4 F dang nungi timba kümra.

- Chiyongtsü/tzü junga achi-ajem masüba.

- Temang lulaa aoba/zükla zükla akümba.

- 'Chest in drawing', temang mekong akümba, sentsü mait akümba.

- Temang nung anakra adokba, tebang mechi, temeli, teka aser tetsüng merem-merema küma awakba.

10. Tashidak temaitsü aliba metetra mesüra timtem kanga mejungi kümra:

Tanurtem metetimi tango sashiba/tango sashitsü timtemba/ SPO2<94 lira, ana meta mozüki nung junga jembiteper sülen, COVID Health centre mesüra mozüki tangai anir aotsüla.

Mozü magütsüdang, tamasa medical practitioner ka dang junga asüngdangyatsüla. Iba dak sendakba nung osang tejangja agitsü atema toll free ph.no - 1800-345-0019/ National- 1705 nung tongtepratepang.

Nisung kar dang Covid-19 temaitsü lir, Covid tendangadokang. Negative tendangtetba sülen, kasa timtem agi kangshira, RT-PCR mesüra TruNat ajanga tanaben tendangang.

Teti tekümdangtsü meratem talisa tejak nembangba mask inoktsü, mapang shia teka metsütsü/shidoktsü, lokti nungi pilar alitsü aser nungdak melira kidang nungi mayazüktsü tetuyuba nung anidakang.

Asen sasa aser asenoki meibatam kümzüka ayutsü asoshi Vaccine agitsüba dak alaka tanga lenmang mali.

MULUNGNEN O

Onoki teti meima aliba obala Asür **N. Wati Aier** (Mopungchuket) pa Hospital nung tatsü ka shiranga aliba mapang aser pa iba lima nungi pilar onok mangyim tejashi nung alidang, shirnokisa ozü dang meima sarasadem, nübo aser rongsen agi yaritepogo nenok ajak dang onoki kangasa pelaba lemsateper.

Onoki tsüngtong arua nenok ajak dang pelaba meshitetaka asen tebu tsüngremi nenok mapa tajung asoshi teti moajangma ta ozü sarasadem



Lt. N.Wati Aier
(Asü 29-09-2021)

- Temeim kinungtsü, Chirnur aser kinungertem

Ajay Devgn indang 'Maidaan' sangküm June 3 nung sayatsü

Mumbai, Mongputeni/ October 01, 2021 (Agencies):

Bollywood superstar Ajay Devgn-i tongti shilem agiba film - "Maidaan" ya sangküm June 3, 2022 nung sayatsü, ta Brehostibarnü sangdong ka ajanga film producer Boney Kapoor-i metetdaksü.

Maidaan ya Indian football otsü nung ajemdaker yangluba project ka asütsü aser iba film nung Devgn-i Syed Abdul Rahim ama shilem agiba angutsü. Rahim-i 1950 nungi tenzüka pa asüba küm - 1963 tashi Indian football team indang coach aser manager ama inyakogo.

Boney Kapoor, shibai "Mr India", "No Entry", "Judaai", "Wanted" aser "Mom" densema film balala nung producer ama inyakogo, pai Twitter sabang ajanga "Maidaan" sayatsü osang lemsatepa liasü.

"Iba otsü ya aikati mangashidang alitsü aser otsü ajanga külem sensopurtem nüma-atangtsü. June 03, 2022 nü alima ajanga nung Maidaan sayatsü," ta pai ashi.

Devgn-ia Twitter ajanga iba

osang lemsatepa liasü aser iba otsü ajanga India nung ajak atsüa arutsü imlar, ta pai ashi.

"Maidaan' otsü ajanga linük nung sensopur ajak molungjang nung jembitsü aser asenok ajaki iba otsü metetta alitsüla ta nibo bilemer. June 03, 2022 nü alima tesem ajanga nung iba film sayatsü sentong lir," ta Ajay-i lemsatep.

Alima ajanga asüngba Covid-19 wara ajanga, iba sports drama sayatsü atema aiben anogo atsülangja aruogo.

"Maidaan" film Amit Ravindernath Sharma-i direct süogo. Sharma-i nungtugu film "Badhaai Ho!" direct asüba ajaki jangjaa lir. Maidaan atema Saiwyn Quadras-i screenplay aser dialogue tem Ritesh Shah-i zülutsüogo.

Zee Studios aser Boney Kapoor longjemer sayatsü aliba film nung Ajay dak alaka, Priyamani, Gajraj Rao aser Bengal actor Rudranil Ghosh nungeri tongti shilem agiogo.

Iba project atema Kapoor-isa den Akash Chawla aser Arunava Joy Sengupta nungeri producer inyakogo.

Mkg nunga National Voluntary Blood Donation Day mungogo



Mokokchung nung 'National Blood Donation Day' amungdang temulungertemi azü tenla agütsüba mapang tangokba noksa nung angur. Mokokchung, 1st October, 2021

Mokokchung, 1st Oct (TYO): "Give blood and keeps the world beating" omen nung ajemdaker India lima tesem balala nung 'National Voluntary Blood Donation Day' Mokokchung nunga DAPCU aser Blood Bank IMDH den külem sür Mokokchung District Voluntary Blood Donors Association (MDVBDA)-i IMDH conference hall nung sentong tajung ka ayongzüka kaogo.

Sentong nung IMDH Blood Bank M.O, Dr. Apong Sangtam-i

ajungmeso o kar ashiba den MDVBDA tir, Molo Jamir-i National Voluntary Blood Donation Day amungba ratet ashi. Iba sentong nung People's College, School of Nursing, College of Teachers Education, Red Cross Society, Rotary Club, Royal Enfield Club Mokokchung, CMO aser Assam Rifles nungi temulungertem arua shilem agia aden aser sentong temer külen temulung 23 bendenteta liasü, ta MDVBDA tir Molo Jamiri iba osangbener den jembidang metetdaksü.

Archery World Cup: Deepika aser Atanu na tsükogo

Yankton, Mongputeni/October 01, 2021 (Agencies): Hokolbarnü, Yankton (USA) kübok ayonga asayaba World Cup Final nung, India nung Archery asayar apuani, Atanu Das aser Deepika Kumari naprongla pei pei tata bronze medal match nung tsükogo.

India indang recurve coach medeni Atanu aser Deepika nati iba asayamung nung shilem agia liasü.

Tebur bronze playoff nung, Das-i 6-0 (27-29, 26-27, 28-30) agi Olympic champion aser Turkey nung Mete Gazoz makok. Deepika atema la kinungbo Das-i coach ama nungita liasü, saka tetsür bronze medal play off nung Olympic team bronze-medal angur Michelle Kroppen-i World no. 2 Deepika tsükdaksü.

WCF nung Deepika-i tibenbuba shilem agia liasü aser iba shoot-off nung Deepika-i 5-6 (6-9) agi Michelle makok.

Tokyo Olympics quarter-final nung tamakok anguba sülen, ita ana lir Deepika-i iba asayamung nung shilem agia liasü. Bronze play-off nung Germany tsür Michelle-i

Deepika asemben tashi tsükdakja 4-0 agi la tejkadang kümadok.

Mezüng set ana nung, Michelle-i 30-28, 30-29 agi Deepika ajatet aser tasembubana nung asayar anaprongla point kasa shi kümadok.

Iba round set pezübubana nung, world no. 14 Michelle-i bilemba ama masayatet aser lai red circle (8) nung khalokja liasü. Iba mapang, Deepika-i maongka ngua lai point kati (28-27) iba set akok.

Set pungobubana nung, Deepika 3-5 agi tesülen ser asaya aser lai point 28 shi ngutet. Ajisüaka, shoot-off nung, Deepika-i blue ring' nungang khalokja point angutsü maongka aika mengutet.

Archery World Cup nung, silver medal pezü aser bronze medal ka angur, Deepika-i tan asayamung quarter final nung Olympic team silver-medal angur Russia tsür Svetlana Gomboeva madak 6-4 agi takok angu.

Iba sülen, semifinal nung, Tokyo Olympics silver-medal ana angur Russia tsür Elena Osipova-i 6-2 agi Deepika tsükdaksü.

Kasa asayamung tebur quarter final tetoktepba nung, Das-i 6-2 agi Germany nung Maximilian Weckmueller tsükdaksü, saka semi-final nung pai 2-6 agi world no. 1 USA nung Brady Ellison makok.

Sangdong ajanga angazükba agi, Deepika indang coach B Srinivas Rao ya tena (Atanu aser Deepika) den külemi Yankton-i aotsü sentong renemer liasü, saka mapang tongti iba sentong melenshiadok.

"Rao aser compound coach ama Lokesh Chand na den külemi Atanu aser Deepika na iba asayamung atema Yankton-i aotsü renemer liasü, saka asayamung atongtsü lia iba sentong melenshiadok," ta ketdangsür kati ashi.

Brehostibarnü, külem India nung compound archer takotet, Abhishek Verma, shibai taoba mapang World Cup Final nung medal asem tashi ngua lir, pai iba asayamung nung medal ka danga menguteti tembang. Mezüng round nung, USA nung silver medal angur Braden Gellenthien-i Verma tsükdaksü.

SSF Junior World Championships: Sekhon-i Silver medal angu



Lima, Mongputeni/October 01, 2021 (Agencies): International Shooting Sport Federation (ISSF) Junior World Championship, koba Peru kübok Lima nung ayonga asayadar, iba asayamung tanünübubana nung, Women's Skeet asayar takotet India tsür Ganemat Sekhon-i Silver medal takok angu.

Brehostibarnü, Sekhon-i silver medal anguba densema India team-i medal pungobubana takok angur asütsü.

Sekhon, shiba Chandigarh nungi lir, taküm küm tetenzüklen New Delhi nung lai senior ISSF World Cup nung mezüng medal ngua liasü.

Junior World Championship final nung Sekhon-i America tsür Alisha Fayth Layne den toktepa liasü, kong 60-shot final sülen, asaya anaprongla tie (46) nung tembang. Ajisüaka, Shoot-off nung la tsükadok. Iba asaya final nung Italy tsür Sara Bongini-i bronze medal angu.

Ano, Women's 10M Air Pistol nung külem India tsür Manu Bhaker-i gold medal aser Esha Singh-i silver medal takok angu.

Iba asayamung tanünübubana nung, India atema, Men's 10M Air Rifle tetoktepba nung Mumbai nungi Rudranksh Balasaheb Patil-i mezüng silver

medal angu aser Women's 10M Air Rifle nung Ramita-i bronze medal ngua liasü.

Women's Skeet final nung India tsür Raiza Dhillon-i target 20 nung 14 dang khashiba ajanga la jenjang trokbubana nung tembang. Men's 10M Air Pistol final tetoktepba nunga, Naveen-i jenjang pezübubana, Sarabjot Singh-i trokbubana aser Vijayveer Sidhu-i tibubana nung tembangba atema parnoki medal ka danga mengutet.

Men's Skeet nung India nung tetokteper asem rongnung kati danga final metongtet. Par asemji Rajveer Gill, Abhay Singh Sekhon aser Ayush Rudraraju nung asütsü. Iba final nung asayar trok shi tokteper.

Iba asayamung tasemnübubana, kong final ana asayatsü lir, iba nung Men' aser Women's Team Skeet tetoktepba dena lir. Junior World Championships nung, USA sülen India team tanabubana jenjang nung lir.

Brehostibarnü, America team-i gold medal asem densema medal trok shi takok angu. Men's 10M Air Rifle nung Olympic champion William Shaner-i gold medal angu. India dak alaka, iba asayamung nung France aser Belarus team anapronglai gold medal nguogo.

Asian TT Championships: India tebur team-i bronze medal angu



Doha, Mongputeni/October 01, 2021 (Agencies): Hokolbarnü, Lusail Sports Arena, Doha kübok Asian Table Tennis Championships asayamung semifinal nung, India tebur team-i 0-3 agi South Korea makokba sülen, parnoki bronze medal nguogo.

Bodhbarnü, iba asayamung quarter final nung, India team-i 3-1 agi Iran tsükdaksüba sülen, medal ka angutsü imlaa liasü. Semifinal nung, South Korea team-i India den kanga toktepa asaya aser India-i tie ka danga akoktsü maongka mengutet.

Tebur kija semi final nung world no. 38 India nung G Sathyan-i world No. 12 Korea nung Woojin Jang makok. Woojin-i 11-5, 10-12,

11-8, 11-5 agi Sathyan tsükdaksü. Iba asaya game tanabubana nung Sathyan-i koka liasü, saka tanüngba game ana tashi nung pai tamakok angu.

Sharath Kamal-i junga asaya tenzük aser pa 2-1 agi Korea nung Lee tejkadang ser asaya liasü. Ajisüaka, world No. 22 Lee Sangsu-i iba asaya tatembubana game ana tashi atonga koka liasü aser 7-11, 15-13, 8-11, 11-6, 11-9 agi asaya koktet.

Harmeet Desai aser Seungmin Cho na asayaba mapang, Desai 2-1 agi tejkadang liasü. Ajisüaka, world No. 77 Cho-i point angutsü maongka tajung kar ngutet aser Desai den meneptepa 2-2 asaya. Cho-i 11-4, 9-11, 8-11, 11-6, 13-11 agi Desai tsükdaksü. Iba asaya

minute 43 nung tembang.

Kasa asayamung tetsür tetoktepba nung, India tetsür team-i 'position playoff' nung kanga dang meranga asaya liasü aser parnoki Thailand tetsür team madak 3-1 agi takok anguba sülen, jenjang pungobubana nung tembang. Iba playoff nung India atema Olympic nung shilem agila Sutirtha Mukherjee-i shilem tuluka agiogo.

Archana Kamath-i Thailand tsür Suthsani Sawettabut sen asaya liasü. Suthsani, shiba World No. 38 nung lir, asaya tetenzüklen lai junga asaya liasü, saka Archana-i point pezü tashi atonga ngua la den meneptepa (2-2) asaya. Ajisüaka, decider nung Suthsani-i takok ngua 11-7, 7-11, 11-6, 10-12, 11-9 agi Archana tsükdaksü.

Thailand tsür asayar tasen, Phantita Pinyopisan ase Mukherjee na asaya liasü. Minute 18 nung, Mukherjee-i Phantita madak 11-5, 11-5, 11-6 agi takok angu.

Kasa play-off nung, Sreeja Akula-i 11-7, 11-6, 11-2 agi Wirakarn Tayapitak tsükdaksü. Ano, Mukherjee-isa Thailand tsür Sawettabut madak 11-7, 11-6, 10-12, 11-7 agi takok ngua liasü.

Football match ka aonung asayadangogo

Kohima, Mongputeni/October 01, 2021 (TYO): Aruya aliba 21st NSF Martyr's Memorial Trophy atema, Hokolbar aonung Angami Students' Union (ASU) den 21st Naga Students' Federation (NSF) Martyr's Memorial Trophy indang organizing Committee longjemer Indira Gandhi Stadium, Kohima nung football match ka ayonga asayadanga liasü, ta sangdong ajanga metetdaksü.

Iba stadium nung, Astro turf pitch aser floodlight maparen junga achaayanga renemer aliba ngua Organizing Committee convenor

Dievi Yano-i pelaba lemsatepogo.

Ita ka ayonga asayatsü aliba 21st NSF Martyr's Memorial Trophy ya October 9, 2021 nikongdang 4:30 ako nungi tenzüksü terenemba lir.

Iba asayamung indang mezüng round match anüngdang asayatsü. Iba sülen, quarter final match nungi tenzük final tashi aonung asayatsü renemogo.

Anungji, iba asayamung nung shilem agitsü tejangrar team temi October 6, 2021 tashi entry form tem agütsüsüla, ta kasa sangdong nung shia lir.

BILEMDANGANG

"Tekazung agi rongsen tulu penzudang nungibo, teka nung rongsen tera alibaji taoba."